

TULLIUS LAUREA

Quo tua, Romanae vindex clarissime linguae,
 silva loco melius surgere iussa viret
 atque Academiae celebratam nomine villam
 nunc reparat cultu sub potiore Vetus,
 hoc etiam apparent lymphae non ante repertae 5
 languida quae infuso lumina rore levant.
 Nimirum locus ipse sui Ciceronis honori
 hoc dedit, hac fontes cum patefecit ope,
 ut, quoniam totum legitur sine fine per orbem,
 sint plures oculis quae medeantur aquae. 10

M. FURIUS BIBACULUS

I. Epigrammata

1 (3)

Si quis forte mei domum Catonis,
 depictas minio assulas et illos
 custodes videt hortuli Priapos,
 miratur, quibus ille disciplinis
 tantam sit sapientiam assecutus, 5
 quem tres cauliculi, selibra farris,
 racemi duo tegula sub una
 ad summam prope nutriant senectam.